

IPAD-FRÉTTIR

Upplýsingar um það sem er efst á baugi í innleiðingu spjaldtölva

Stafræn borgaravitund


Eins og margir vita hafa kennsluráðgjafar útbúið verkefni fyrir kennara þar sem fjallað er um ýmis mikilvæg málefni sem lúta að ábyrgri notkun nemenda á netinu, tölvum, spjaldtölvum og annarri tækni. Hingað til hafa þessi verkefni verið send kennurum mánaðarlega en nú hefur þeim öllum verið safnað saman á einn stað svo kennarar geti gripið til þeirra þegar þörf krefur. Ljóst er að fræðsla um málefni af þessu tagi er mikilvægur þáttur í nútíma skólastarfi.

Verkefnin má nálgast hér.

Apple Teacher

Nýlega kynnti Apple nýjung fyrir kennara sem nýta búnað fyrirtækisins í kennslu. Um er að ræða þjálfunarefni sem kennarar geta hlaðið niður og einnig er hægt að taka próf úr efni á vefnum og fá þannig eins konar vottun sem Apple-kennari.

Enn sem komið er geta kennarar á Íslandi aðeins nýtt sér þetta efni með erlendu Apple-auðkenni.



Fræðslufundir fyrir foreldra

SamKóp stóð fyrir þremur fræðslufundum fyrir foreldra í febrúarmánuði, þar sem aðalfyrirlesarinn var Lilja Rós Agnarsdóttir félagsráðgjafi. Yfirskrift fundanna var *Uppeldistækni og tækniuppeldi* og var markmiðið að styðja við foreldra í því að hafa stjórn á tölvu- og netnotkun barna. Ýmis úrræði voru kynnt fyrir foreldrum, til dæmis samningur um tölvunotkun barna á heimilinu.

Starfsfólk spjaldtölvuverkefnis grunnskóla tók einnig til máls á þessum fundum, sem voru vel sóttir og líflegir. Tækifæri gafst til að ræða við foreldra um hugmyndafræðina á bak við spjaldtölvuverkefnið, ástæður þess að nemendur fái að fara heim með spjaldtölvurnar óháð því hvort kennarar hafi sett fyrir heimaverkefni og margt fleira. Ýmis tæknileg úrræði voru kynnt fyrir foreldrum á þessum fundum, meðal annars hvernig stilla má aðgengi að efni á netinu, hvernig hægt er að sjá aldursmerkingar á leikjum og öðrum forritum og margt fleira.

Leiðbeiningabæklingur fyrir foreldra hefur verið útbúinn og er aðgengilegur á vef spjaldtölvuverkefnisins [hér](#).



Nýtt aðsetur teymis

Eins og margir vita hefur spjaldtölvuteymið haft aðsetur í Kópavogsskóla. Um síðustu áramót þurfti að gera breytingu þar sem skólinn þurfti að nota kennslustofuna þar sem skrifstofa teymisins hafði verið.

Ýmsir möguleikar voru skoðaðir en niðurstaðan varð sú að þegar upplýsingatæknideild Kópavogs myndi flytjast úr Fannborg 2 á Digranesveg 1 ætti spjaldtölvuteymið að koma sér fyrir á fyrstu hæðinni í Fannborg. Var það gert í janúar en þá kom upp sú staða að nýta þyrfti fyrstu hæðina sem kennslurými fyrir Kársnesskóla.

Núverandi aðsetur teymisins er baka til á fjórðu hæð í Fannborg, en flestir starfsmenn á þeirri hæð hafa nú fært sig yfir á Digranesveg. Vonir standa til að hægt verði að finna varanlega lausn á húsnæðismálum spjaldtölvuteymisins með vorinu.



Engisprettufaraldur!

Breytingar verða gerðar á vinnufyrirkomulagi kennsluráðgjafa við spjaldtölvuverkefnið í apríl og maí. Breytingin er gerð til að ráðgjafarnir geti nýst fleiri kennurum en til þessa hefur verið hægt.

Í stað þess að einn kennsluráðgjafi sé í hverjum skóla einn dag í viku eins og verið hefur hingað til, mun skólum nú bjóðast að fá alla kennsluráðgjafana í skólann í tvo heila daga. Sett verður upp dagskrá í samráði við skólastjórnendur þar sem kappkostað er að sem flestum kennurum bjóðist að fá aðstoð kennsluráðgjafa.

Eftir að kennslu lýkur á þessum dögum verður boðið upp á námskeið fyrir kennara. Einnig má geta þess að stefnt er að því að bjóða kennurum úrval ókeypis námskeiða um spjaldtölvur í námi og kennslu **fimmtudaginn 18. maí**, þar sem þjálfarar verða úr hópi fremstu sérfræðinga Íslands á þessu sviði.



**Snjalli segir:
NJÓTIÐ PÁSKANNA!!!**